

# MATURITY SERIES

## PAG-AMPO (1) (Maturity Series: Lesson One)

“...pag ampo kanunay.” -Roma 12:12

“Padayon kamosa pag ampo...” -Colosas 4:2

1. PAG-AMPO 1
2. PAG-AMPO 2
3. PAG-AMPO 3
4. PULONG SA DIYOS
5. PATUKORANAN
6. PAGHINULSOL
7. PAGTUO 1
8. PAGTUO 2
9. PAGHATAG
10. ADLAW SA GINOO
11. BALANG ESPIRITU 1
12. BALANG ESPIRITU 2

### UNSA ANG PAG-AMPO?

Ang pagka-Kristohanon dili lang pag-apil ug usa ka relihiyon. Una sa tanan usa kini ka pakig-relasyon sa buhi nga Dios. Ang pakigdait O pag-istoryahay importante kaayo aron dunay maayo og nagatubo nga relasyon. ***Ang pag-ampo mao ang pakighinabi sa atong Amahan. Moistorya kita kaniya ug siya usab moistorya nganhi kanato.*** Mao kini ang sakto nga pag-ampo. Dili usa lang ka linya kundili duha. Adunay panahon nga ‘moistorya kita’ ug adunay panahon nga ‘maminaw kita.’ Daghang paagi nga makig-istorya ang Dios ngahi kanato pero ang pinaka-klaro mao ang mga *pulong nga atong mabasa sa Biblia*. Mga buhing pulong diin nagadasig, nagabadlong, nagatudlo og nagagiya kanato (Hebreo 4:12). Moistorya kita kaniya ug siya usab moistorya nganhi kanato. Mao kini ang sakto nga pag-ampo. Pakighinabi sa Dios (dialogue) ug dili lang pag-istorya sa Dios (monologue).

### NGANONG MO-AMPO MAN KITA?

Daghan kaayo reason nganong moampo kita pero ang duha sa pinaka reason mao kini:

## 1. Pagpalalom sa atong relayon sa Dios.

“Duol kamo sa Dios ug muduol siya kaninyo.” - Santiago 4:8

- Wala nagpasabot nga mga anak na kita sa Dios *“lalom”* na dayon ang atong relayon kaniya. Ang Pagpalalom ug relayon kinahanglan lihokon ug trabahoan. Pinaagi sa paghatag ug panahon sa pag-ampo atong masinati ug mailhan pagdugang ang atong Ginoo. Kung taas ang panahon nga atong ihatag kaniya masuod nato siya pag-ayo sama sa gibuhat ni Moises ug Josue (Exodo 33:11). Mo-ampo kita aron mailhan nato pagdugang ang atong Amahan sa Langit.

## 2. Pagdawat gikan sa Dios.

“Pangayo kamo, ug kamo hatagan; pangita kamo, ug kamo makakaplag; pagtuktok kamo, ug ablihan ang pultahan a lang kaninyo.”

Mateo 7:7

- Adunay sobra 3,000 ka mga saad sa Dios nga nasulat sa Biblia, ug kini mahimong mga saad lang nganhi kanato kung wala kita nasayod niini ug dili kita kahibalo moampo. Ang Biblia nagsulti nga

“Ayaw kamo kabalaka sa bisan unsa, kondili Pangayoa sa Dios ang inyong gikinahanglan uban ang pagpasalamat sa tanan ninyong pag-ampo”.

Filipos 4:6.

## UNSA MGA PRINSIPYO SA PAG-AMPO?

### 1. Pag-ampo sa tago

“Ug kon mag-ampo ka, ayaw panig-ingon sa mga tigpakaaron-ignon. Gusto silang magtindog nga mag-ampo sulod sa mga sinagoga ug diha sa mga eskina sa kadalanan aron makita sila sa mga tawo. Sultihan ko kamo nga gigantihan na sila. Apan kon mag-ampo ka, sulod ngadto sa Imong lawak, unya takpi ang pultahan, ug pag ampo saimong Amahan nga dili makita. Ug gantihan ka sa imong Amahan nga nag tan-aw sa Imong gibuhat sa tago.”

Mateo 6:5-6

- Ang atong mga pag-ampo dili para makita sa tawo nga kita diosnon. Ang pag-ampo sa *“tago”* nagpasabot nga ang atong motibo dili *“pakitang tao”* kondili para gyud sa Ginoo.

### 2. Pag-ampo nga adunay pagsabot kinsa ang Dios.

“Sa inyong pag-ampo, ayaw daghana ang inyong mga pulong ingon sa gibuhat sa mga pagano nga naghunahuna nga dunggon sila tungod sa taas nilang nilang pag-ampo. Ayaw panig-ingon kanila kay ang inyong Amahan nahibalo nang daan sa inyong gikinahanglan bisan gani sa dili pa kamo mangayo kaniya”

Mateo 6:7-8

- Daghang mga Kristohanon mora ug mga pagano. Sila nagtuo nga pinaagi sa ilang taas ug balik-balik nga mga pag-ampo motubag ang Ginoo. Ang ilang panan-aw sa Dios walay pagpakabana ug dili interesado motagbo sa ilang mga panginahanglan. Kini nga paghunahuna sayop. Nag ingon si

Jesus ***nga wala pa gani kita nangayo nahibalo nang daan ang atong Amahan sa langit.*** Kini nagpasabot nga ang Dios nagpakabana ug andam siya motagbo sa atong mga panginahanglanon kung kita mangayo (Mateo 7:7)

Efeso 5:20

### 3. Pag-ampo uban sa pagtuo.

“Walay makapahimoot sa Dios kon walay pagtuo kay ang muduol sa Dios kinahanglan gayod motuo nga adunay Dios ug gantihan niya ang nangita kaniya” .

Hebreo 11:6

- Makadawat kita sa Dios pinaagi sa atong pagtuo (Mateo 9:9). Dili mutubag ang Dios sa bisan unsa lang nga pag-ampo kondili kadto lang *‘pag-ampo sa pagtuo’* (Marcos 11:24).

### 4. Pag-ampo ngadto sa Amahan sa langit.

“Ingna niini pag-ampo; ‘Amahan namo nga naa sa langit..’”

Mateo 6:9

- Ang gitudlo ni Ginoong Jesus nga pag-ampo sa iyang mga tinun-an ***“diretso sa Amahan nga langitnon.”*** Ayaw pangita ug larawan orebolto hinuon pakig-istorya sa imong Amahan nga “dili makita” (Mateo 6:6). Kinahanglan mobalik kita unsay gitudlo sa Biblia aron epektibo atong pag-ampo.

### 5. Pag-ampo pinaagi sa pangalan ni Jesus.

“Sa ngalan sa atong Ginoong Jesu-Kristo pagpasalamat kamo kanunay sa Dios Amahan tungod sa tanan butang.”

- Si Jesus lang ang miadto sa krus aron pagbayad sa atong mga Sala ug tungod niini siya lang ang tigpatunga sa Dios ug sa tawo (1 Timoteo 2:3-6). Busa walay maka-adto sa Amahan gawas kaniya (Juan 14:6). ***Tungod sa atong pagkahiusa kang Jesus magamit nato ang iyang pa ngalan pagpangayo sa Amahan ug dunggon kita*** (Juan 16:23). Ang Biblia nagatudlo nga moampo kita ngadto sa Amahan pinaagi sa panagalan ni Jesus nga atong manluluwas ug manlalaban (Efeso 5:20, 1 Juan 2:1).

### 6. Pag-ampo nga giniyahan sa Espiritu Santo.

“Sa samang pagkaagi, sa atong pagkahuyang tabangan kita sa Espiritu, kay wala kita masayod unsaon nato pag-ampo...”

Roma 8:26

“Buhata kining tanan diha sa pag-ampo, ug Pangayo kamo kanunay sa Espiritu.”

Efeso 6:18a

- Bisan ug nangayo kita diretso sa Amahan pinaagi sa panagalan ni Jesus kung wala magiyahi ug maubani ang atong mga pag-ampo sa Balaang Espiritu dili gihapon kini matubag. ***Ang pag-ampo dili pag pangayo unsay imong gusto kondili pagpangayo unsay gusto sa Dios para kanimo.*** Madungog ang atong gi-ampo kung kini sibo sa iyang hingpit nga kabubut-on (1 Juan 5:14). Dili kita makahibalo sa kabubut-on sa Dios sa atong kaugalingon busa ang Espiritu Santo nga mogiya kanato.

## 7. Pag-ampo nga kinasing-kasing.

“Unya mosangpit ug mag-ampo kamo kanako ug tubagon ko kamo. Mangita kamo kanako ug hikaplagan ako ninyo kay kinasing-kasing man ang inyong tinguha.”

Jeremias 29:12-13

- Gibadlong ni Ginoong Jesus ang mga Pariseo ug mga magtutudlo sa Balaod nga sila nag simba sa baba lang apan ang ilang kasingkasing wala (Mateo 15:8). *Kinahanglan atong masabtan nga ang Dios wala mag tan-aw unsay porma sa atong mga pag-ampo sa gawas kondili ang porma sa atong kinasingkasing sa sulod* (1 Samuel 16:7, Lukas 18:9-14)

### PAG-APLIKAR NGA MGA PANGUTANA:

- Nakadungog naba kita sa tingog sa Dios? Kanus-a?
- Unsay atong panan-aw sa Dios – manggiluloy-on o estrikto?
- Makasulti ba kita nga lalom na ang atong relayon sa Dios? Ngano man?
- Sa pito ka mga prinsipyo sa pag-ampo asa ang wala pa nato ginabuhat?

## PAG-AMPO (2) (Maturity Series: Lesson Two)

### UNSA ON NATOPAG-AMPO?

“Ingna niini pag-ampo; ‘Amahan namo nga naa sa langit; Simbahon ang ngalan mo; Maghari a kanamo, ug tumanon ang imong pagbuot dinhi sa yuta ingon nga gituman kini did to sa langit. Ihatag kanamo ang kalan-on nga among gikinahanglan karong adlaw; Ug pasayloa kami sa among mga sala, ingon nga gipasaylo namo ang nakasala kanamo. Ayaw kami itugyan sa malisod nga pagsulay; luwasa hinuon kami sa Daotan. (Kay imo ang gingharian, ang gahom ug ang himaya hangtod sa kahangturan.)”

Mateo 6:9-13

Mao kini ang gitudlo ni Ginoong Jesus nga pag-ampo para sa tanan magtutuo. Dili kini isag-ulo (memorize) kondili usa kini ka “*giya*” O “*han-ay*” (outline) unsaon pag-ampo. Kung imong sundown ang han-ay niini nga pag ampo kompleto ang imong pag-ampo. **Unsay nalangkob niini ngahan-ay sa pag-ampo?**

#### 1. Paghatag ug pag simba sa Dios

“Amahan namo nga naa sa langit; Simbahon ang ngalan mo...” -  
Mateo 6:9

- Kini nga klase sa pag-ampo mao ang pinaka important tungod kay imong ginatagaan ug “pagsimba” ang imong Amahan sa langit. Niini nga pag-ampo ikaw nagahatag ug...

...pagpasalamat unsay iyang nabuhat kanimo (Salmo 95:2)

...pagdayeg kung kinsa siya sa imong kinabuhi (Salmo 103:1-5)

...pagsimba sa iyang kahalangdon ug kataas (Salmo 95:6-7)

- Niini nga pag-ampo, ***“wala ka Naga pangayo sa Dios kondili ikaw ang nagahatag kaniya unsay iyang gipangita, tinuod nga pagsimba”*** (Juan 4:23-24). Niini nga pag-ampo ang imong tumong mao ang Amahan ug dili ang iyang mga butang. Ang iyang nawong ang imong ginapangita ug dili ang iyang kamot. Ang imong motibo mao ang pagpanalangin kaniya pinaagi sa imong mga pagdayeg ug pagsimba ug dili lang ang pagdawat gikan kaniya.

## 2. Pangaliyupo nga ang katuoyan sa Dios moabot ug matuman

“Maghari ka kanamo, ug tumanon ang imong pagbuot dinhi sa yuta ingon nga gituman kini didto sa langit.”

-Mateo 6:10

- Dili tanan nga gakahitabo sa atong mga kinabuhi ug palibot kabubut-on sa Dios. Adunay mga panghitabo nga minugna sa panulay o minugna lang sa tawo, busa gitawag kita pag-ampo niini nga klase nga pag-ampo. Pag-ampo nga maghari ang katuyuan sa Dios dinhi sa yuta sa nga kini gipatuman didto sa langit. Atong e-ampo nga ang Gingharian ug katuyuan sa Dios maoy matuman sa atong :

- I. Kinabuhi
- II. Pamilya/Pamilya
- III. Trabaho/Negosyo/Ginabuhay
- IV. Lokal nga Iglesia
- V. Komunidad/Silingan
- VI. Pang-goberno
- VII. Nasod
- VIII. Tibuok Kalibutan

## 3. Pagpangayo sa adlaw-adlaw nga mga gikinahanglan

“Ihatag kanamo ang Kaplan-on nga among gikinahanglan karong adlaw...”

-Mateo 6:11

- Kung ang mga yutan-ong amahan aduna gani tinguha pagtagbo sa mga gikinahanglanon sa ilang mga anak, labaw na gyud ang atong Amahan sa langit (Mateo 7:9-11). Gimandoan kita ni Jesus pagpangayo sa atong Amahan unsay atong mga gikinahanglan adlaw-adlaw. Adunay uban nga wala makadawat tungod kay wala sila nangayo (Santiago 4:2).

Mga rason ug babag nganong ang atong mga gipangamoyo dili matubag:

- I. Sala (Isaias 59:1-2, 1 Pedro 3:12)
- II. Pagduhaduha (Santiago 1:6-7)
- III. Sayop nga motibo (Santiago 4:3)
- IV. Panagbikil (1 Pedro 3:7)
- V. Dili hingpit nga kabubut-on sa Dios (1 Juan 5:14)
- VI. Walay maayong relasyon kang Kristo (Juan 15:7)

#### 4. Pagpangayo ug pasaylo sa atong mga sala

“Ug pasayloa kami sa among mga sala...”

-Mateo 6:12

- Dili plano sa Dios nga kita makasala pero kung makasalakita gitawag kita pagduol kaniya pinaagi sa atong manlalaban nga si Ginoong Jesus (1 Juan 2:1). Gitawag kita pag-kompisal ug pagtalikod sa mga sala nga atong nagbuhat (Panultihon 28:13). **Ayaw ikompisal sa Dios ang mga sala nga dili nimo gusto biyaan.** Kung tininuod ang imong pagpangayo ug pasaylo adunay duha ka butang nga mahitabo: “pasayloon niya ang atong mga sala” ug “hinloan niya ang atong mga kasingkasing gikan sa kadaotan” (1 Juan 1:9).

#### 5. Paghatag ug pasaylo

“Ingon nga gipasaylo namo ang nakasala kanamo.”

-Mateo 6:12

- Tungod kay ang Dios nagpasaylo na kanato diha kang Kristo kita usab mohatag ug pasaylo ngadto sa uban (Efeso 4:32). Mao kini ang pinaka-reason nganong mohatag kita ug pasaylo sa mga nakapasakit kanato bisan ug wala sila nangayo ug pasaylo nganhi kanato. **Tungod kay kita nakadawat, kita usab mohatag.** Wala kita ka tungod nga mangayo ug kapasayloan sa Dios sa atong mga sala kung kita usab dili maantigo mopasaylo sa sala sa uban (Mateo 6:14-15).

#### 6. Pagpangayo og panalipod

“Ayaw kami itugyan sa malisud nga pagsulay; luwasa kami sa daotan.”

-Mateo 6:13

- Gusto sa Dios nga panalipdan kita gikan sa mga kadaotan ug disgrasya (Salmo 91:9-10). Kini ang katuyuan sa Dios nganhi kanato pero kinahanglan moampo kita adlaw-adlaw aron kini matuman. Mangayo kita sa iyang mga angel nga maoy mag-uban kanato bisan asa kita padulong (Salmo 91:11). Kinahanglan usab nga mag lakaw kita sa iyang katuyuan ug pamaagi kay walay bili ang atong pagpangayo ug panalipod kung kita mismo maoy mi-abli sa pultahan aron ang panulay makapanghilabot kanato (Efeso 4:27).

#### 7. Paghatag ug pasidungog

“Kay imo ang gingharian, ang gahom ug ang himaya sa kahangtoran.”

-Mateo 6:13

- Nagsugod kita sa atong mga pag-ampo sa pagpataas ug pag simba sa Dios, muondang usab kita sa atong mga pag-ampo sa maong paagi. Nagsugod kita sa pagpasalamat sa iyang mgagibuhay, mound ang kita sa pagpasalamat nga siya naminaw ug mutubag sa atong mga gipangayo (Filipos 4:6). Nagsugod sa pagdayeg, motapos usab sa pagdayeg.
- Niini usab nga pag-ampo atong gina-deklara nga iya ang gingharian, gahom ug himaya. Iya ang tanan ug walay ato.

Nagsugod kita sa pagpaubos motapos kita sa pagpaubos. Kay ang pag simba mao man ang pagpaubos sa taas ug halangdon nga Dios.

#### **PAG-APLIKAR NGA MGA PANGUTANA:**

Pagpili ug tulo sa mga pangutana:

- ◆ Sa pito ka klase nga pag-ampo pila ang wala pa nimo nabuhat?
- ◆ Nagahatag ka ba kada-adlaw ug panahon sa pagdayed ug pagsimba sa Dios?
- ◆ Nagahatag ka ba ug mga pag-ampo sa uban? Kinsa man ang imong gina-ampo?
- ◆ Unsay imong gipangayo nga hangtof karon wala pa natubag? Ngano kaha?
- ◆ Unsa sa mga babag sa tubag sa mga pag-ampo ang anaa kanimo?• Mapasaylo ba kita kung dili kita mopasaylo sa uban?
- ◆ Sakto ba ang pag-ampo nga walay uban ang pasasalamat?

### **PAG-AMPO (3)** **(Maturity Series: Lesson Three)**

#### **UNSAON PAGLAMBO SA IMONG MGA PAG-AMPO?**

“Kaadlawon pa gani,mibangon na si Jesus ug milakaw. Migawas siya sa lungsog ug miadto sa usa ka dapit nga awaaw ug nag-ampo didto.”

-Marcos 1:35

Ang atong espirituhanon nga pag-uswag nagdipende sa atong pagtuo sa mga pag-ampo. Ang mainampoon nga Kristohanon kanunay nagatubo sa mga butang sa Dios. Maghisgot kita karon ug pito ka mga butang nga makapalambo sa atong pakighinabi sa atong Amahan.

#### **1. ANG DIOS UNA ANG UBAN**

- Si Ginoong Jesus nakighinabi unsa sa iyang Amahan usa mibuhat sa ubang mga butang (Marcos 1:35-39). Siya ang akong ehemplo. **Daghan kaayo kitag buhaton kada adlaw pero ang pinaka-una nato nga tulomanon mao ang pagpangita sa nawong sa atong Amahan sa langit.** Kinahanglan ang Dios maoy anaa sa atong mga paghunahuna pagmata nato sa buntag ug dili ang atong pamilyaa, trabaho ug uban pa. Siya ang atong kaistorya una kita nakatulog nianang gabii ug siya usab ang una natong maistorya pagmata nato sa buntag. Ang pagpalalom ug pagmintinar sa atong relasyon sa Dios maoy una natong gipakabili labaw sa tanan.

## 2. TAKNA SA PAG-AMPO

- Si Ginoong Jesus kaadlawon pa nag-ampo na (Marcos 1:35). Maka ampo kita sa bisan unsang oras pero maayo gyud nga mohatag kita ug panahon sayo sa buntag. Si Haring David nagapangita sa Dios matag-buntag (Salmo 5:3, 59:16, 88:13). Mao usab si propeta Isaias, ginapukaw sa Dios matag-buntag ug ginapakig-istoryahan (Isaias 50:4). Hinuon, dili lang kita sobra ka istrekto niini nga bahin pero ang Punto nga aduna kitay sakto nga panahon nga atong igahin sa mga pag-ampo, buntag ba kana, udto o gabie. Si Daniel gani naga-ampo katulo sa usa ka adlaw (Daniel 6:10). *Important usab nga imong matakda ang oras o takna sa Imong pag sugod ug ampo.* Alas 4:00 ba sa buntag, alas 5:00, alas 6:00 o unsang orasa. Sa panahon nila ni Pedro ug ni Juan alas 3:00 sa hapon ang ilang panahon sa pag-ampo nga hinugpong (Buhat 3:1). Part kini aron atong maimposar ang pagdisiplina sa kaugalingon. Nianang orasa moampo gayod kita.

## 3. GIDUGAYON SA PAG-AMPO

- Kinahanglan imo sang matakda ang gidugayon sa imong paghatag ug panahon sa pag-ampo ug dili lang ang oras sa imong pagsugod. **Kinahanglan aduna kitay tumong ug pag plano sa atong pag-ampo.** Pila ka minuto o oras ba ang atong ihatag sa pakighinabi sa Dios matag-adlaw. Sa panahon nga nag-ampo si Ginoong Jesus sa Gethsemane iyang giagni ang iyang tulo ka disipolo nga moampo uban kaniya bisag usa lang ka oras (Mateo 26:40). Niini nga bahin ang usa ka oras nga pag-ampo hinangyoan pa lang atubangan sa atong Ginoo. *Siguro dili dayon nimo maabot kana nga gidugayon sa pag-ampo pero*

*nindot nga imong tinguhaon nga makahatag ka ug usa ka oras nga pag-ampo matag-adlaw (pinakamubo).* Mag sugod ka siguro og 15 minutos karon, 20 minutos sunod adlaw, 30 minutes sunod semana, 45 minutos sa ikaduha ka semana ug 1 ka oras na sulod sa tulo ka semana nga pagdisiplina. Magsugod ka sa gamay ngadto pataas. Moabot ang panahon nga ang duha o tulo ka oras nga pakighinabi sa Dios kulang na kaayo kanimo.

## 5. PAGDISIPLINA SA UNOD O LAWAS

- Ang atong Espiritu gusto moampo pero ang atong lawas luya (Mateo 26:41). Kinahanglan atong madaog ang atong unod aron motubo kita sa mga pag-ampo. Ang atong “unod” mao ang numero uno natong kalaban sa pag-ampo. **Ang atong espiritu gusto na mangita sa presensiya sa Dios pero ang atong lawas gusto pa matulog, mopahulay, mukaon, mutrabaho, ug magdula.** Sa makadaghang panahon ang ginatuman sa mga Kristohanon mao ang “unod” ug dili ang “espiritu” nga ginatukmod sa Balaang Espiritu nga moampo. Kinahanglan atong mansohon ug disiplinahan ang atong lawas sama sa gibuhay ni Apostol Pablo (1 Corinto 9:27). Ang pag panton sa atong lawas molangkob ug 6 ngadto 8 ka semana. Dili sayon ang “pagdisiplina” sa kaugalingon pero mubonga kini ug maayo nga batasan (habit). Pinugos pa ang imong pag sugod sa pag-ampo pero moabot ang panahon nga kini nagahatag na kanimo og dakong kalipay.

## 5. LUGAR SA PAG-AMPO

- Si Jesus miadto gyud sa awaaw nga dapit aron moampo (Marcos 1:35). Pangita ug lugar nga dili ka madisturbo. Kung



mahimo kanang dapit diin dili mabalda ang imong pandungog ug panan-aw (awaaw). Si Daniel didto nag pa-ampo sa iyang lawak (Daniel 6:10). Adunay higayon nga si Pedro didto nag-ampo sa itaas sa atop sa balay (Buhat 10:9). Kung walay lugar sa imong balay pangit a ug dapit sa gawas nga awaaw ug mingaw sama sa gibuhay ni Jesus (Marcos 1:35).

## 6. PAPUNO SA PULONG SA DIOS

- Adunay kalambigitan ang atong mga pag-ampo sa atong kahibalo sa pulong sa Dios. Kasagar ang atong I-ampo kinutlo o nasubay sa pulong sa Dios nga atong nahibaloan (Salmo 119:147, 149, 164, 170). **Sa makadaghan ang imong kahibalo sa pulong sa Dios magkadaghan usab ang imong masulti ngadto sa Ginoo.** Kung gusto ka nga mutubo ang imong mga pag-ampo ipatubo ang imong kahibalo sa pulong sa Dios.

## 7. PAGKOMITAR SA PAGKAMAINAMPOON

- Kinahanglan ang pagkomitar sa pagka-mainampoon para motubo ka sa mga pag-ampo. Batasana nga magmainampoon ka sa tanan takna ug sa bisan asang lugar. Ang pag-ampo mag sugod sa kasingkasing. Pwede ka maka-ampo sa walay hunong (1 Tesalonica 5:17). **Makaistorya ka sa Dios bisan asa ug makaistorya siya kanimo sa tanan panahon.** Bisin asa kita moadto and Dios naga-uban kanato ug pwede kita makighinabi kaniya. Atong tinguhaon nga ang pag-ampo mahimo nang parte kanato (orayer must be a lifestyle).

## PAG-APLIKAR NG MGA PANGUTANA:

- ✧ Aduna na ba kitay oras nga gigahin sa mga pag-ampo? Unsay orasa ug unsa ang gidugayon niini?
- ✧ Unsay mga babag nganong dili kita maka-ampo pag-ayo? (unod, trabaho, katapulan, lugar) Andam ba kita modaog batol niini?
- ✧ Nagahatag ba kita ug panahon sa Biblia diha sa atong mga pag-ampo?
- ✧ Gina tan-aw ba nato ang pag-ampo nga ginabuhay lang sulod sa balay o dapat ipadayon pag buhat bisan asa kita niana nga adlaw? Pwede ba storyahan ang Dios bisan asa?

## ANG PULONG SA DIOS

(Maturity Series: Lesson 4)

“Ang Kasulatan nag-ingon, ‘Dili mabuhi ang tawo sa pan lamang, kondili sa matag pulong usab nga isulti sa Dios.’”

Mateo 4:4

Ang pulong sa Dios maoy atong espirituhanon nga pagkaon. Sama nga gutomon kita sa pisikal nga pagkaon (gulay, isda, karne, kan-on ug uban pa), ang tinuod nga mga anak sa Dios gutomon gayod sa langitnon nga pagkaon nga mao ang “pulong sa Dios.” **Usay mahitabo kung dili kita makakaon?**

- i. **Maluya ang atong espirituhanon nga kinabuhi**
- ii. **Magmasakiton ang atong espiritu ug kalag**
- iii. **Mamatay ang atong gugma, pagtuo ug panan-awon sa Ginoo**

**Unsaon nato pagkaon ang Pulong sa Dios?**

### 1. PAGBATON UG BIBLIA

Kinahanglan makabaton ka ug Bibilia nga imoha gyud. Sa imong pagpalit pilia ang Bibilia nga imo gyung masabtan. Bisaya nga pagkahubot kong dili ka kasabot kaayo ug iningles, ug “English” kung kasabot ka. Pilia usab ang dagko ug litra nga pagkasulat aron ganahan ka mobasa. Ang imong Bibilia maoy usa sa pinaka-importante nimong butang niining kalibotana. Ang panghunahuna ug tanang katuyoan sa Dios nasulat niini nga libro sa tanang libro.

### 2. PAGHATAG UG PANAHO PAGBASA SA BIBLIA

- Bisag unsa kadaghan ang imong Bibilia sa balay kung dili kini nimo basahon wala gihapon kini bili kanimo. Kinahanglan mohatag ka ug igong panahon sa pag-abli ug pagbasa niini.
- Ihatag ang imong pinakamaayo nga panahon sa adlaw aron presko pa ang imong hunahuna nga modawat sa mensahe sa Ginoo.
- Maayo sab nga magsugod ka ug basa sa Bag-ong Tugon aron dili kaayo ka malisdan. Mas dali nimo masabtan ang Karaang Tugon kon nahuman na nimo ang Bag-ong Tugon.
- Paghimo ug tumong (goal) nga makabasa ka ug tulo ka kapitulo matag adlaw (3 Chapters a day).

### 3. PAGDAWAT UG MENSAHE SA DIOS DIHA SA BIBLIA

Sa imong pagbasa sa Bibilia ayaw lang para makatuon ka kondili **para usab makadungog sa Dios**. Gusto ang Dios makigsulti kanato pinaagi sa Biblia. Sa imong pagbasa sa Bibilia adunay mga bersikulo nga makigsulti kanimo. Hait ug buhi kini nga mga pulong sama sa espada nga duhay suwab (Hebreo 4:12). Gitawag kini sa Grego nga pinulongan nga “**rhema**” o sa English pa “**Spoken word**” o “**now word**”. Tingog kini sa Dios nga naghatag ug mensahe sa imong kinabuhi ug sitwasyon. Ang Diyos nakig-istorya kanimo pinaagi sa mga pasahe Sa Bibilia aron ikaw madasig, malig-on, mabadlong, matudloan ug matagaan ug panan-awon. Kung adunay mga

bersikulo nga nakig-istorya kanimo samtang ikaw nagabasa sa Biblia dawata kini nga “*mensahe gikan sa Ginoo.*”

Ayaw lang basta basaha ang Biblia, pangayo ug “rhema words” gikan sa Dios. Ang mga “rhema words” maoy atong espirituhanon nga pagkaon (Mateo 4:4). **Dili igo ang pagpaminaw sa “pulong sa Dios” kinahanglan makadungog kita sa “tingog sa Dios.”** Kinahanglan nato masinati ug mailhan ang Dios nga nagsulti sa Biblia!

#### 4. PAMALANDUNGI ANG MENSAHE SA DIOS

Sa dihang adunay mga bersikulo sa Biblia nga mitandog o nakig-istorya kanimo (rhema words), paghatag ug panahon nga imo kining mapamalandungan. Ang pagpamalandong mao ang dugang paghunahuna mahitungod sa kahulogan ug implikasyon sa maong pasahe sa Biblia nganha sa imong kinabuhi ug sitwasyon. Ang pagmalandong sa pulong sa Ginoo makahimo kanato nga makinaadmanon (Salmo 119:98-100). Pamalandong unsay mga....

- i. Mando sa Dios nga tumanon
- ii. Prinsipyo nga sundon
- iii. Sala nga hinulsolan
- iv. Saad nga angkonon
- v. Ehemplo nga paga-awaton
- vi. Pahimangno nga angay likayan

#### 5. ISULAT ANG MENSAHE SA DIOS

Ang Habacuc 2:2-3 nagsulti nga atong isulat ang mga pinadayag sa Dios nganhi kanato (rhema words). Mas maayo nga magbaton ka ug “devotional notebook” diin imng isulat ang mga mensahe nga imong nadawat sa Dios sa panahon nga ikaw anaa sa mga pag-ampo ginamit ang Biblia. Dinhi niini nga “devotional notebook” imong

isulat ang mga saad sa Dios, mga mando sa Dios, mga panghimangno sa Dios u gang imong buhaton para imo kining maaplikar nga mga mensahe sa imong kinabuhi ug sitawasyon.

#### 6. SAG-ULOHA ANG PULONG SA DIOS

Nindot ug maayo usab kaayo kung imong masag-ulo ang mga bersikulo nga ginahatag sa Ginoo kanimo. Sa Karaang Tugon gimandoan sa Dios ang iyang katawhan nga tipigan ang iyang pulong nganha sa ilang mga hunahuna ug kasingkasing (Deuteronomio 11:18). Imo kining masag-ulo pinaagi sa pagbalikbalik ug basa sa makusog nga tingog. Tinguhaa nga matag adlaw aduna kay masag-ulo nga bersikulo sa Biblia. Importante kini aron daghan ug magamit ang Espiritu Santo sa imong kinabuhi kay kini mao ang iyang espada (Efeso 6:17).

#### 7. IKINABUHI ANG PULONG SA DIOS

Ayaw lang paminawa ang pulong sa Dios kondili ikinabuhi kini. Ang tawo nga kanunay naminaw sa pulong sa Ginoo apan walay pagtuman niini naga-ilad sa iyang kaugalingon (Santiago 1:22). Wala kita gitawag para lang makasabot sa pulong sa Dios apan sa pagkinabuhi niini. Ang kahibalo nga wala gikinabuhi us aka pagpuyo nga hipokrito atubangan sa Ginoo (Mateo 23:2-3)

#### 8. IPADAYON PAGKINABUHI ANG PULONG SA DIOS

Dili igo ang pagsugod pagkinabuhi sa pulong sa Dios apan kinahanglan mopadayon kita pagtuman niini hangtod sa iyang pagbalik. Adunay mga Kristohanon nga maayo lang mituman sa dihang bag-o pa sila sa Ginoo apan sa dihang nagkadugay na sila, ang ilang nahibaloan wala na nila ikinabuhi. Puno sila sa kahibalo apan wala na sa buhat. **Kinahanglan atong i-aplikar ang atong**

natun-an sa sinugdanan bisan ug dugay na kita sa Ginoo (1 Juan 2:24). Mao kini ang timailhan sa tinuod nga mga disipolo (Juan 8:31).

**PAG-APLIKAR NGA MGA PANGUTANA:**

- ❖ Unsay atong buhaton aron madisiplina ang atong pagtuon sa pulong sa Dios?
- ❖ Unsay mga babag nganong ang uban dili makatuman unsay ilang naduggan sa Bibilia?

**PATUKORANAN**  
**(Maturity Series: Lesson 5)**

Maghisgot kita karon unsa ka importante ang pagtukod ug lig-on nga “Patukoranan” para sa atong kinabuhi. Sama sa balay, dili kini makatindog kon walay “Pundasyon” o “Patukoranan”. Ang kusog sa Balay nag depende sa kalig-on sa patukoranan nga iyang gitindogan. Sa mao gihapong paagi, ang tawo nga adunay maayong *“esprirituhanon ng patukoranan”* magpuyo nga lig-on, kusgan, ug madaogon nga kinabuhi. Si Ginoong Jesus naghigot mahitungod sa duha aka patukoranan sa Mateo 7:24-27 (basaha).

**DUHA KA KLASSE NGA TAWO**

Makita nato sa atong gibasa nga naghigot ang atong Ginoo ug duha ka klaseng tawo: **maalamon** (*wise*) ug **buang buang** (*foolish*). Ang basihan ni Jesus sa iyang paghukom kung asa ang maalamon ug asa ang buang buang dili sa ilang pagka-intelihente o pagkamaayo ug hunahuna kon dili asa nila gibutang ang ilang Kinabuhi (*balay*) – Sa lig-on ug nga patukoranan o Sa huyang nga patukoranan. Kung ang imong pundasyon maayo, maalamon ka nga tawo!

**DUHA KA KLASSE NGA PATUKORANAN**

Makita nato sa estorya nga adunay duha ka klasse nga pundasyon. **Bato** nga gahi ug Lig-on ug **Balas** nga huyang ug dali ra mabanlas.

1. **Ang Bato** – mao si **Kristo** nga atong Ginoo. ( 1 Corinto 10:4). Siya ang bililhong bato nga maoy atong sukaranan (1 Pedro 2

:6). Gihulagway si Jesus nga “bato” tungod kay lig-on ug dili mausab sama gihapon siya kaniadto, karon ug hangtod sa kahangtoran ( Isaias 26:4; Hebreo 13:8). Siya ang nag-inusarang patukoranan nga gihatag sa Dios nga Amahan aron atong matukoran sa atong mga kinabuhi ( 1 Corinto 3:9).

2. **Ang Balas** - nag hisgot sa bisan unsa , gawas kang Jesu-Kristo, diin gihimong mga Patukoranan sa mga tawo. Naghisgot kinin sa mga sayop ug huyang kayo nga mga pundasyon sa tawo.

**Unsa man kini nga mga PATUKORANAN:**

- i. **RELIHIYON**- Ang ilang pagsalig ug paglaom anaa sa ilang pundok o sekta. Mas gimahal ug gipataas nila ang ilang grupo kay sa Ginoo.
- ii. **KUWARTA ug BAHANDI** - Ang ilang kinabuhi ug kalipay anaa nag-agad sa mga butang niining Kalibutana. Ang ilang bili o pagkatawo nag-agad unsa kadaghan ang ilang natigom ug naangkon nga mga kabtangan o bahandi. Dato sila sa mga butang niining kalibotana pero pobre kaayo sa presensya sa Ginoo.
- iii. **TAWO** – Nagsalig sila sa ubang mga tawo. Morag dili sila mabuhi kung wala ang uban nga mutabang kanila. Ang ilang pagsalig anaa sa ilang kapikas sa kinabuhi, parente, o mga higala ug wala sa buhi nga Dios.
- iv. **PAGTULON-AN SA TAWO** – Ang uban natukod sa ilang pagtuo ug pagsalig sa mga pagtulon-an sa mga tawo ug dili sa pulong sa Dios nga mao ang Biblia.

- v. **KAUGALINGON** – Ang uban salig pag-ayo sa ilang kaugalingon ug wla sa Dios.

#### **MGA BAGYO SA KINABUHI**

Sa estorya ang duha ka balay naigo gayod sa makusog nga Ulan,Baha ug Hangin. Nagpasabot nga ang tanang tawo moagi gayod ug mga Problema. Wala nagpasabot nga anaa kana sa Ginoo wala nay krises o bagyo sa imong kinabuhi nga moabot. Nag-ingon si Jesus nga niining kinabuhia anaa gyoy mga problema (Juan 16:33).

#### **BALAY SA BATO**

Ang atong balay kinahanglan matukod sa bato nga mao si Kristo Jesus aron mobarog taliwala sa mga Bagyo ug mga problema nga moabot. Ang “balay” ng aatong itukod nagpasabot sa atong mga *kinabuhi, pamilya, trabaho , negosyo ug uban pa*. Kinahanglan matukod kang Jesus ang atong kinabuhi, pamilya, trabaho, negosyo ug ministeryo aron Lig-on, molahutay ug dili Mapukan. Siya lang ang atong patukoranan ug wala nay lain.

#### **PAGTUKOD SA ATONG BALAY IBABAW SA BATO**

Unsaon nato nga ang atong kinabuhi (balay) matukod kang Kristo (bato)? **Pinaagi sa pagpaminaw ug pagtuman sa iyang Pulong.** Kini ang prinsipyo nga gitudlo ni Ginoong Jesus

#### **PAGHATAG UG PANAHOON SA IYANG PULONG**

Una kita makatuman kinahanglan makadungog usa kita sa iyang pulong. Unsay iyang mga prinsipyo, mga mando ug mga pagtulonan. Ang *Ignorante* nga tawo sa “Pulong sa Dios” dili gayod makatuman, kay unsa may iyang tumanon kung wala siya makahibalo unsay angay niyang tumanon. Kinahanglan mohatagkitag panahon sa pagbasa,pagtuon ug pagpaminaw sa

Biblia. Ang iya sa Dios mohatag gyud ug panahon sa iyang pulong (Juan 8:47).

### **PAGTUMAN UNSAY NADUNGGAN**

Tama naba ang pagpaminaw sa pulong sa Dios? *Dili*, Gitawag ni Ginoong Jesus ang tawo nga nakadungog sa iyang pulong apan wala nagatuman niini ug “buang buang. Mas maayo pag tawo ang motawag kanato ug buangbuang kay sa atong Dios! Pero mao kana ang tawag ni Jesus sa mga masupilon sa iyang pulong. Buangbuang . **Ang tinuod nga kahibalo dili lang pagpuno sa atong mga hunahuna sa pulong sa Dios kondili ang pagkinabuhi niini.** Kung wala pa nimo na-aplikar kana nga kahibalo dili pa kana tinuod nga kahibalo. Ang tinuod nga kahibalo mao kadtong parte na kanato. Kanang ato nang ginabuhat. Gitawag kita sa Dios pagtuman unsay atong nadungog ug dili sa pagpaminaw lang (Santiago 1:22). Tinguhaon nato nga moabot ang punto sa atong pagsunod kaniya nga ato nang kalipay ang pagtuman sa iyang mga mando ( Salmo 199:56).

### **RESULTA SA ATONG PAGKINABUHI UNSAY ATONG NADUNGGAN**

Gahom ug kalig-on ang moabot kanato sa dihang ato nang ikinabuhi ang atong natun-an gikan saiyang pulong. Kay sa matag paminaw ug tuman nato sa iyang pulong naga-lalom ang atong relasyon kaniya, ang punoan ug tuburan sa tanan nga maayo (Juan 15:5). Kung kita nagabuhat niini sa makanunayon gayod (Pagpaminaw ug Pagtuman), kusgan ug magmadaogon kita nga mga Kristohanon. Dili matay-og ug matumba sa mga pagsulaysa kinabuhi

### **PAG-APLIKAR SA KAUGALINGON:**

- ❖ Unsay nakatandog kanato sa atong leksyon? Ngano man?
- ❖ Makasulti ba kita nga wala na sa balas ug anaa na sa bato? Ngano man

## **PAGHINULSOL**

### **(Maturity Series: Lesson 6)**

#### **ANG DIOS NANGITA UG MAAYONG BUNGA**

Sa Isaias 5:1-7 nasulat ang us aka mag-uuma nga adunay gitanom nga mga paras. Gitanom niya kini sa tabunok nga yuta, giatiman pag-ayo ug gibantayan aron mamunga. Nagpaabot siya ug tam-is nga bunga apan sa dihang mibunga na, namunga kini ug *‘aslom kaayo nga bunga’* (v. 2). Nag-ingon ang Biblia nga ang *‘tag-iya sa parasan’* hulagway sa atong Ginoo u gang *‘parasan’* hulagway kanato nga iyang mga katawhan (v.7). Maayo kaayo ang Dios kanato ug naglaom siya nga kita usab mohatag ug mga maayong bunga ngadto kaniya, apan subo kaayo, kay ang atong bunga dili gayod maayo.

#### **MGA DAOTANG BUNGA**

“Sayon kaayo pag-ila sa buhat niadtong nagsunod sa tawhanong kinaiya. Makita kini diha sa malaw-ay, hugaw ug hilas nga mga buhat, ingon man sa pagsimba sa mga diosdios ug sa pagpamarang. Makita usab kini sa pagdinumtanay, pagbingkilbingkil, sa kasina, sa kapungot, sa kahakog, sa pagkabahinbahin, pagkamasinahon, pagkapalahubog, pagkamapatuyangon sa lawasnong pangaydoy, ug uban pa pang mga butang nga sama niini. Busa pasidan-an ko kamo karon sama sa akong gihimo kaniadto: ang magbuhat niining mga butanga walay dapit sa Gingharian sa Dios.”

Galacia 5:19-21

Gisulat kini ni Apostol Pablo ngadto sa mga *“magtutuo”* sa Galacia. Nagpasabot nga possible kaayo nga us aka Kristohanon nagpuyo gihapon sa sala. Apan nasayod kita nga ang Dios nagtawag sa tanang magtutuo pagpamunga ug mga maayong bunga. Kay kung dili sila mamunga pagaputlon sila gikan sa punoan. (Juan 15:2).

#### **PAGHINULSOL ARON ADUNAY MAAYONG BUNGA**

Mga ‘maayong kinaiya’ ang timaan nga kita nakabig gayod ngadto sa Ginoo. Kini nga mga maayong bunga Makita lang sa atong kinabuhi kung aduna kitay *“tinuod mga paghinulsol.”*

“...maghinulsol sila ug mamalik sa Dios, ug magbuhat sa mga butang nga magpaila nga nangakabig sila.”

Buhat 26:20

“Buhata ninyo ang mga butang nga magpaila ninyo ang mga butang nga magpaila nga kamo mibiya na sa inyong mga sala.”

Lucas 3:8

#### **DUHA KA KLASE NGA PAGHINULSOL**

1. **Sentro sa tawo** ---- Adunay mga tawo nga naghinulsol tungod kay nahibaloan ang ilang mga sala ug naulaw sila pag-ayo sa nahitabo. Adunay uban nga naghinulsol tungod kay samok na kaayo ang ilang mga kalag tungod sa sala nga ilang ginahimo. Ang uban naghinulsol tungod sa mga negatibo nga panghitabo o katalagman nga bunga sa ilang mga sala nga nahimo. Ang uban naghinulsol aron mahaw-as sa tunglo ug mapanalanginan. Naghinulsol sila kay aduna silay makuha nga maayo para sa ilang kaugalingon. **Ang tumong ug motibo sa ilang paghinulsol sentro sa kaugalingon.**

**2. Sentro sa Dios** --- Naghinulsol tungod kay napasakitan ang balaan nga Dios.

“Nakasala ako kanimo---kanimo lamang, ug nabuhat ko ang giisip mong daotan.”

Salmo 51:4

Mao kini ang pag-ampo ni David sa dihang nakasala siya atubangan sa Dios ug sa tawo. Naghinulsol siya tungod kay iyang nasabtan nga napasakitan niya ang Balaang Dios. Naghinulsol siya tungod kay gusto niya lipayon ang Dios nga nasubo tungod sa iyang mga sala nga nahimo. **Kini nga klase sa paghinulsol sentro sa Dios ug mao kini sakto.**

#### **DILI TINUOD NGA PAGHINULSOL**

Ang paghinulsol dili lang *pagbasol sa sala o sayop nga nahimo*. Parte kini pero dili kini kompleto tungod kay adunay mga tawo nga nagbasol sa ilang sayop nga nahimo pero wala gihapon nabag-o. Sama kang Esau (Hebreo 12:17) ug kang Judas (Mateo 27:3-5). Tungod kay daghan ang wala gayod makasabot pag-ayo unsa ang paghinulsol, kanunay sila nagabalikbalik sa mao rang sala nga gusto na nilang mawala. Mao usab kini ang rason nganong daghan ang wala makalahutay sa ilang pagsunod sa Ginoo.

#### **ANG PAGHINULSOL USA KA PROSESO**

Aron atong masabtan pag-ayo ang tinuod nga paghinulsol magahisgot kita karon ug tulo ka pulong nga gikan sa Bag-ong Tugon:

**1. Pagpadayag (Revelation)** – sa Grego nga pinulongan *“apokalupsis”* nga nagkahulogan *“pagtangtang sa tabil o pagbukas”* (*kalupis* – “tabon o tabil”; *apo* – “tangtang”). Naghisgot kini sa Dios nga nagatangtang sa taptap sa atong mga hunahuna aron paghatag ug kahibalo nga nagagikan sa diosnon nga paglantaw (godly perspective).

**2. Paghinulsol (Repentance)** – sa Grego nga pinulongan *“metanoia”* nga nagkahulogan ug *“bag-o nga pagsabot”* (*meta* – “bag-o; *noeo* – “pagsabot”). Usa kini ka ‘bag-ong pagsabot ug panlantaw’ nga miabot human sa karaang pagsabot. Usa kini ka *“bag-o nga hunahuna.”* **Ang paghinulsol mao ang pagbag-o sa panghunahuna (change of mind).**

**3. Pagtalikod (Turning)** – sa Grego nga pinulongan *“epistrepho”* nga ang kahulogan mao ang *“pagtalikod ug pag-adto sa bag-o nga dalan.”* Resulta kini sa *pagpadayag ug paghinulsol* (Buhat 3:19).

■ Atong isumpay ang tulo ka mga pulong aron ato gayong makuha ang buot ipasabot sa tinuod nga paghinulsol. **“Dawata ang panan-awug pagsabot sa Dios sa imong sitwasyon aron makabalik ka ug makalakaw sa iyang dalan ug pamaagi.”**

Ang Dios motangtang sa mga taptap sa atong hunahuna pinaagi sa paghatag kanato ug mga inpormasyon nga nagagikan sa iyang panlantaw (padayag) aron mabatonan nato ang iyang hunahuna (paghinulsol) ug unya makabalik ngadto sa dalan sa Dios (pagtalikod). Mao kini ang proseso sa “tinuod nga kabag-ohan.” Adunay parte ang Dios ug adunay parte ang tawo. Ang parte sa Dios mao ang pagpadayag sa iyang hunahuna ug ang parte sa tawo mao ang pagdawat ug pagkinabuhi niini nga panghunahuna.



## **PAGTUO (1)**

**(Maturity Series: Lesso 7)**

### **PAG-APLIKAR NGA MGA PANGUTANA:**

- ◆ Nakabaton ka na ba ug paghinulsol nga sentro sa Dios ug dili lang sa kaugalingon?
- ◆ Aduna bay tinuod nga paghinulsol kung dili manginlabot ang Ginoo? Ngano man?

### **LIMA KA KAMATUORAN MAHITUNGOD SA PAGTUO**

#### **1. Ang pagtuo nagatawag niadtong wala pa nga anaa na (Faith Assures).**

- Ang kahulogan sa pagtuo mao ang pagsalig nga siguro na nga moabot unsay imong ginalaoman bisan ug wala pa kini Makita nga mga mata (Hebreo 11:1). Ang tinuod ng pagtuo *“nagatawag na sa mga butang nga wala pa nga anaa na.”* Mao kini bga klase sa pagtuo ang gikinahanglan aron ang atong mga ginapangayo sa Dios mahatag. Pagtuo nga anaa na bisan ug wala pa Makita (Marcos 11:24).
- Gitawag kita paglakaw sa pagtuo ug dili sa atong Makita sa pisikal nga mga mata (2 Corinto 5:7). Ang atong pagtuo nabasi sa atong paglaom ug gilaoman (Hebreo 11:1). Kini nga paglaom nabasi sa mga saad sa Dios nga iyang nasulti nganhi kanako (rhema words) sa dihang kita mihatag ug panahon sa mga pag-ampo ug sa pagpamalandong sa iyang pulong.

#### **2. Ang pagtuo mao ang pagsalig sa kakayahan ug abilidad sa Dios (Faith Trusts).**

- Adunay mga problema nga gitugotan sa Dios nga moabot kanato aron kita dili na mosalig sa atong kaugalingon kondili ngadto na kaniya (2 Corinto 1:8-9). Kini nga pagtuo mohatod kanato ngadto sa:

- i. Pag-ampo ug pagpangayo (2 Corinto 1:10-11)
- ii. Pagpangayo ug giya (Panultihon 3:5-6)
- iii. Gahom sa Dios (2 Corinto 12:9-10)

### 3. Ang pagtuo mao ang pagbuhat (Faith Acts).

“Ingon niini ang pagtuo: patay kini kon dili ubanan sa buhat.” – Santiago 2:17

- Ang pagtuo nga walay binuhatan sama sa lawas nga walay espiritu – patay (Santiago 2:26). Bisan si Satanas u gang iyang mga demonyo mituo nga adunay usa lang ka Dios pero kini nga pagtuo wala maubani sa pagtuman sa mga prinsipyo sa Dios (Santiago 2:19). Ang tinuod nga pagtuo aduna gyuy binuhatan. Kini nga klase sa pagtuo magahatod kanimo sa....

#### i. **Tinuod nga kaluwasan ug pagkamatarong** (Santiago 2:14, 23-24)

Dili kita maluwas sa tawhanong binuhatan kondili pinaagi lang sa pagtuo. Apan atong sabton nga ang atong “tinuod nga pagtuo” mobunga gyud ug binuhatan. Mao kini ang pagtuo nga makaluwas. Sa ato pa kung tinuod gyud kita nga “luwas o adunay pagtuo” Makita gyud kini sa atong bunga. Kung anaa kita sa punoan mamunga gyud kita (Juan 15:5).

Pero ato sang sabton nga ang pagpamunga hinayhinay ug dili dihadia. Busa bantayan nato nga dili kita makahukom sa uban nga dili pa pareha kanato kadaghan ug bunga. Usahay anaay kabag-ohan nga ania na kanato apan wala pa sa uban. Aduna say kabag-ohan nga nasinatian na sa uban pero wala pa kanato.

- ii. **Pagtabang sa sa mga nanginahanglan** (Santiago 2:20-22)
- iii. **Paghatag sa Dios unsay iyang gusto o pagtuman** (Santiago 2:20-22)

Si Abraham mihalad sa iyang bugtong anak nga si Isaac bisan ug dili niya kini gusto. Tungod sa iyang pagtuo andam siya motuman bisan unsa basta sa Dios.

- iv. **Pag-alagad ug paghimo ug mga dagkong butang para sa Dios** (Hebreo 11:31-34)

### 4. Ang pagtuo nagalahotay ug nagapadayon (Faith Perseveres).

“Ang uban midumili sa pagdawat sa kagawasan, ug nagpakamatay nga sinakit aron banhawon ngadto sa mas maayo pang kinabuhi. May gibugalbugalan ug gilatos, ang uban gigapos ug gibanlod sa bilanggoan. Gibato sila, gitunga paggabas, gipatay pinaagi sa espada. Naglaaglaag sila nga nagbistig panit sa karnero o kanding. Kabos sila, gilutos ug gidaogdaog. Wala sila mahimuot sa kalibotan. Nahidiindiin sila sa mga kamingawan ug mga kabungturan sama sa mga kagiw; nagpuyo sila sa mga langob ug mga lungib. Dalaygon kaayo ang nabuhat niining mga tawhana **tungod sa ilang pagtuo!**”

Hebreo 11:35-39

- Bisan unsa kadaghan ang problema ug pagsulay ang tawo nga puno sa pagtuo nagapadayon. Ang tinuod nga pagtuo mohatod kanato ngadto sa paghuman sa lumba sa kinabuhi.

### 5. Ang pagtuo nabasi sa Buhi nga Dios (Faith Experience).

Busa ang inyong pagtuo wala magbarog diha sa kaalam sa tawo kondili sa Buhi nga Dios.

(1 Corinto 2:5)

- Ang tinuod nga pagtuo wala nasang-at sa tawo o sa mga doktrina sa tawo kondili sa Buhi nga Dios.
- Kung ang atong pagtuo anaa sa Buhi nga Dios magsugod siya ug padayag nganhi kanato. Adunay tulo ka paagi diin ang Dios magpadayag kanato:
  - I. **Makigsulti siya kanato** (Juan 10:4, Gipadayag 2:7)  
Dili lang makadungog ang Dios kanato kita usab makadungog kaniya kung kita mohatag ug panahon sa pag-ila ug pagpaminaw sa iyang tingog.
  - II. **Mopabati siya kanato sa iyang presensiya** (Buhat 2:1-4)  
Ang unang mga Kristohanon wala lang nagawali sa pulong sa Dios kondili nagapadayag sa buhi nga presensya sa Dios ngadto sa ilang mga bag-ong nadala sa Ginoo (Buhat 8:14-18)
  - III. **Mohimo siya ug mga milagro diha kanimo ug pinaagi kanimo** (Hebreo 2:4)  
“Ug kini ang mga timailhan sa gahom nga mabatonan nila nga motuo: sa akong ngalan maghingilin silag mga yawa ug manulti silag lainlaing mga sinultihan; kon makakupot silag mga halas o makainom silag hilo, dili sila maunsa: itapion nila ang ilang mga kamot sa mga masakiton ug mangaayo sila”.

Marcos 16:17-18

#### **PAG-APLIKAR NGA MGA PANGUTANA:**

- ◆ Sa lima ka klase nga pagtuo asa ang anaa na kanato ug asa ang wala pa kanato?
- ◆ Nganong kinahanglan man ato tawgon ang mga butang nga gisaad sa Dios nga anaa na bisan ug wala pa kini? Unsay kalahian sa “kamatuoran” (truth) ug sa “tinuod” (reality)?

## **PAGTUO (2)**

### **(Maturity Series: Lesson 8)**

Tungod sa pagtuo nahimo si Abraham nga us aka amahan bisan tuod tigulang na siya kaayo ug si Sara dili na makapanamkon. Misalign siya nga tumanon sa Dios ang iyang gisaad”

Hebreo 11:11

Si Abraham gusto maka-anak pero tigulang na siya kaayo u gang iyang asawa dili na puwede mabuntis. Wala na silay mahimo ug wala nay bisan kinsa nga makatabang sa ilang kahimtang. Adunay mga problema sa atong kinabuhi nga dili masulbad ug tawo gawas lang sa tabang sa Dios. Atong estudyohan karon kon giunsa sa Ginoo pagtabang kang Abraham ug sa iyang asawa ug giunsa ni Abraham nga ang Dios nakalihok sa iyang lisod kaayo nga sitwasyon. Pinaagi niini nga pagtulon-an daghan kitag matun-an bahin sa pagtuo.

#### **1. ANG PAGTUO MOABOT KUNG MAKADUNGOG KA SA TINGOG SA DIOS**

- Si Abraham wala lang dayon basta mituo sa Dios kondili una sa tanan nakadawat siya ug saad gikan sa Dios (Hebreo 11:11; Genesis 12:7). Ang pagtuo nagagikan sa Dios (Roma 12:3) ug moabot kini kanato kon kita makadungog ug “mensahe” gikan kaniya. Kini nga pulong dili ordinary nga pulong kondili tingog sa Dios. Mao kini ang “*rhema words*” nga atong gihisgutan sa “Maturity Series-Lesson 4: Pulong sa Dios. “Kining *buhi nga pulong* nga nakig-estorya kanato

sibo sa atong kahimtang gikan sa balaang Espiritu. Kung kita makadawat ug mensahe sa Dios (Spoken words) matawo ang pagtuo sa atong kasing-kasing. Kung kining buhi nga pagtuo atong ikompisal ug atong ibuhay dako kaayo ug kahimuan tungod kay kini sibo sa gisulti sa Dios nganhi kanato (Mateo 14:29).

## 2. ANG BASIHANAN SA ATONG PAGTUO MAO ANG KINAIYA SA DIOS

- Si Abraham adunay ensaktong pagsabot sa kinaiyahan sa Dios mao nga misalign siya sa gisaad sa Ginoo (Heb. 11:11). Ang tawo nga adunay saktong pag-ila kinsa ang Dios dili magduha-duha sa mga pulong sa Dios. Adunay tulo ka importante kaayo nga mga butang nga kinahanglan nato mahibaloan sa kinaiya sa Dios:

- i. Ang Dios dili mausab (Malaquias 3:6; Santiago 1:17)
- ii. Ang Dios dili mapakyas (Job 42:2; 1 Cronicas 28:20)
- iii. Ang Dios dili mamakak (Numeros 23: 19; Hebreo 6:18)

Tungod niini nga mga kinaiya kita makasalig nga kon unsay isulti sa Dios nganhi kanato iya gayod kining buhaton. Ang atong Amahan dili mausab, dili mamakak, ug dili mapakyas!

## 3. ANG PAGTUO PAGASULAYAN GAYOD

- Ang saad nga gihatag sa Dios kang Abraham wala dayon matuman, hinuon, miabot pa kini ug 25 ka tuig una natuman. Ang pagtuo ni Abraham gisulayan sa panahon (test of time). Kung ang Dios maghatag ug saad nganhi

kanato, una kini matuman moabot usa ang mga pagsulay aron paghulma sa atong mga kinaiya. Nagapangita kita ug panalangin apan siya nangita ug maayo nga kinaiya aron ang iyang ihatag dili mausik. Niini nga mga pagsulay nanginahanglan kita ug *pagpailob* ug dili lang *pagtuo* aron atong madawat ang mga saad sa Dios (Hebrews 6:12-15).

## 4. BINUHATAN GAWAS SA PAGTUO

- Adunay panahon sa pagpaabot ni Abraham ug ni Sara sa gisaad sa Dios nga sila mihimo ug mga butang nga dili sibo sa plano sa Dios. Mga binuhatan nga gawas sa pagtuo ug bunga sa ilang pagduha-duha. Ilang gitabangan ang Dios sa pagtuman sa iyang gisaad. Gitugotan ni Sara nga makighilawas si Abraham sa iyang ulipon nga Ehiptohanon nga ginganlag Agar. Tungod niini natawo si Ismael (Genesis 16:1-16). Si Ismael bunga sa tawhanong paningkamot nga walay giya gikan sa Dios mao nga kini naghatag ug kasamok sa kinabuhi ni Abraham ug ni Sara hangtod nga ila nalang gitugotan nga mahilayo kini kanila (Genesis 16:4-5; Genesis 21:8-14).
- Usahay pareha kita kang Abraham ug kang Sara nga walay pasensiya sa pagpaabot sa gisaad sa Dios mao nga ang uban natong mga desisyon ug mga ginahimo dili na sibo sa hingpit nga kabubut-on sa Dios ug kini miresulta sa daghang mga "*Ismael*" (*works that are born of the flesh*) nga naghatag ug kagubot ug kabug-at sa atong mga kinabuhi. Kining mga kasamok sa atong kinabuhi nga resulta sa mga sayop nga desisyon maundang lang kung kita '*maghinulsol*' sa atong

'mga patay nga binuhatan' ug mosugod pagbuhat unsay mga ginapabuhat sa Ginoo.

## 5. ANG PAGTUO KINAHANGLAN PAGA-AMOMAHON

- Sa dihang miabot ang pagduha-duha kang Abraham ang Dios mibisita na usab kaniya ug mipahinumdom sa iyang mga saad nga siya ug ang iyang asawa makabaton gyod ug anak nga lalake nga paganganlan ug Isaac (Gen 17:1-22). Usahay kon ang atong pagtuo luya na ang atong Dios gusto molig-on niini pinaagi sa pagpahinumdom kanato sa iyang mga gisaad. Aron ang atong pagtuo kanunay lig-on ug buhi ato kining amomahon pinaagi sa pagpamalandong sa mga saad sa Dios nganhi sa atong mga kinabuhi.

## 6. ANG PAGTUO KINAHANGLAN ILIHOK

- Nag ingon ang Biblia nga si Abraham ug si Sara dili na takos nga maka-anak pero ang Dios naghatag ug katakos kanila aron sila maka-anak sa iyang gisaad. ***Ang katakos gikan sa Dios apan ang paglihok anaa sa tawo. Kawang ang katakos nga gikan sa Dios kung ang tawo dili molihok.*** Si Abraham ug si Sara milihok aron matawo si Isaac. Ang tinuod nga pagtuo aduna gyuy binuhatan ug ang tinuod nga binuhatan nagagikan gyud sa pagtuo (Santiago 2:14-26).

## 7. ANG TINUOD NGA PAGTUO KANUNAY GYUD MAGDALA UG RESULTA

- Sa saktong panahon si Isaac nga gisaad sa Dios kang Abraham ug kang Sara natawo. Ang katumanan sa saad sa Dios kanila naghatag ug dakong kalipay sa ilang mga kinabuhi ug sa tanan nga nakadungog niini tungod kay sila nasayod nga kini lihok sa Dios ug dili sa tawo (Genesis 21:1-7). Ang kahulogan sa pangalang Isaac mao ang. "katawa" o "laughter" sa English. Ang tinuod nga pagtuo nagadala gayod sa mga saad sa Dios nganhi sa atong kinabuhi ug kung kita makadawat na niini mapuno kita sa kalipay ug ang tanan nga nakadungog niini. Ang tawo nga puno sa pagtuo kanunay magmalipayon kay ang mga saad sa Dios kanunay matuman sa iyang kinabuhi.

### PAG-APLIKAR NGA MGA PANGUTANA:

- ◆ Paghatag ug duha ka punto nga nakatandog pag-ayo kanato? Ngano man?
- ◆ Aduna bay nadunggan nato nga saad o mga saad gikan sa Dios? Natuman na ba kini?
- ◆ Aduna bay mga "Ismaels" sa atong kinabuhi nga bunga sa sayop nga mga desisyon?
- ◆ Ato bang gina-amoma ang atong pagtuo pinaagi sa pagpaminaw sa pulong sa Dios?
- ◆ Imo bang gigamit ang mga katakos nga gihatag sa Dios Kanim?

## **PAGHATAG**

### **(Maturity Series: Lesson 9)**

#### **ANG DIOS MAOY TAG-IYA SA TANAN**

“Iya sa Ginoo ang tibuok kalibotan ug ang tanan nga anaa niini; ang yuta ug ang tanan nga nagpuyo niini.”

Salmo 24:1

- Ang tanang butang nga makita ug dili makita iya sa Dios (Salmo 89:11). Ang tanang hayop, langgam, isda, tanom, kahoy, dagat, sapa, bulan, adlaw, ug uban pa binuhat sa Ginoo (Genesis 1). Walay ato niining kalibotana. Ang atong hangin nga ginaginhawa, tubig nga gina-inom, pagkaon nga ginakaon, sinina nga ginasul-ob, ug balay nga ginatuloga iya tanan sa Ginoo. Ang tanang butang iya sa Magbubuhay sa tanan.

#### **ANG TAWO MGA TINUGYANAN LANG**

“Isipa kami nga mga sulogoon ni Kristo nga *gitugyanan* sa mga tinagong kamatuoran sa Dios. Ug kinahanglan sa usa ka *tinugyanan* nga magbinuotan siya sa iyang agalon.”

1 Corinto 4: 1-12

- Ang tawo tinugyanan sa Dios sa tamang butang nga iyang nahimo. Human niya nabuhat ang kalibotan gibutang niya ang tawo aron mag-atiman niini (Genesis 2:15). Daghan ang gipiyal sa Dios nganhi kanato---*katakos, hiyas, kaalam, kahibalo, panahon, pamilya, trabaho, negosyo, ministeryo, bahandi, ug ang atong kinabuhi.*

- Ang Dios nagpiyal kanato sibo sa atong katakos ug kapasidad (Mateo 25: 14-15). Ang gusto sa Dios nga ayohon nato pagdala ang mga butang nga iyang gitugyan kanato kay sa kaulahiang mga adlaw maningil siya kanato kung giunsa nato kini pagdala ug paggamit (Mateo 25:16-30). Kadtong gipiyalan ug daghan paninglan ug daghan, ug kadtong gipiyalan ug mas daghan pa paninglan ug mas daghan pa (Lucas 12:48).

#### **ANG PAGMANDO ANAA SA DIOS UG ANG PAGTUMAN ANAA SA TAWO**

"Apan kinsa ba ako, ug unsa ba ang katawhan ko, nga nakahimo man kami sa paghalad kanimo sa kinabubut-on? Kini nahimo namo kay gikan man kanimo ang tanang butang, ug naghatag lamang kami sa butang nga imo ra usab."

1 Cronicas 29:14

- Siya ang tag-iyang (owner) ug kita mga piniyalan lang (steward). Kung atong nasabtan kini nga kamatuoran dili lisod ang paghatag ug pagbuhi sa mga butang nga anaa sa atong mga kamot ngadto sa katuyoan sa Dios. Kinahanglan atong himayaon ug simbahon ang Dios pinaagi sa atong kinabuhi, kaalam, katakos, kabtangan ug sa tanan nga ania kanato. Unsay iyang gusto maoy atong buhaton. Siya ang nakahibalo unsay maayo kanato. Nasayod kita nga dili siya mopabuhay kanato ug mga butang nga makadaot kanato. Busa atong tumanon ang iyang kagustohan kay kini dili lang mohimaya kaniya apan makaayo usab kanato.

## PAGHATAG SA PANALAPI NGA BAHIN

Sa panalapi nga bahin gitawag kita sa Dios "paghatag" ngadto sa iyang kahimayaan (Mateo 6:4). Daghang klase sa paghatag ang gihisgotan sa Biblia pero maghisgot kita karon ug tulo sa pinaka importante kaayo. Kining tulo kinahanglan buhaton sa matag anak sa Dios.

### ANG PAGHATAG UG...

#### 1. TABANG NGADTO SA KABOS (ALMS)

"Busa kon mohatag kamo sa *tawong kabos*, ayaw kini ipasigarbo ingon sa gibuhad sa mga hambugiro sulod sa mga sinagoga ug sa kadalanan. Nagbuhat sila niini aron daygon sa mga tawo. Apan sultihan ko kamo nga ang naghimo sa ingon gigantihan na. Kon ugaling motabang ka sa usa ka *tawong kabos*, himoa kini sa paagi nga bisan ang imong suod nga higala dili masayod niini.

Mateo 6:2-3

- Gitawag kita paghatag ngadto sa mga kabos sa atong katilingban. Kada buhat nato niini ang atong Ginoo ang natandog ug nalipay (Mateo 25:35-40). Nag-ingon ang Biblia nga kada tabang nato sa mga pobre ang Dios maoy atong ginapahulam (Panultihon 19:17).

#### 2. IKAPULO NGADTO SA PANIMALAY SA GINOO (TITHE)

"Dad-a ang *tibuok nga ikapulo* ngadto sa Templo aron adunay pagkaon didto. Sulayi ako, ug makita ninyo nga ablihan ko ang

bahandi sa langit ug ibubo ko kaninyo sa madagayaon gayod ang mga panalangin.

Malaquias 3:10

"Iya sa GINOO ang tanang ikapulo gikan sa abot sa yuta-sa inani gikan sa uma o sa bunga sa mga kahoy: sagrado kini alang sa GINOO."

Levitico 27:30

- Ang ikapulo o 10% sa tanan natong kita iya sa Ginoo. Sagrado kini kaniya. Kon ato kining gamiton sa ubang mga butang atong ginakawatan ang Dios ug mahiagom kita sa tunglo (Malaquias 3:8). Ang paghatag sa atong ikapulo ngadto sa panimalay sa Ginoo maghatag ug duha ka butang nganhi kanato: "**panalipod sa tunglo**" ug "**pag-abli sa panalangin sa Dios**" (Malaquias 3:10). Atong dal-on ang tibuok ikapulo ngadto sa Templo sa Dios o sa "Lokal nga Iglesia diin kita natanom aron adunay magamit didto.

#### 3. HALAD NGADTO SA TRABAHO SA GINOO (OFFERING)

"Timan-i nga ang nagpugas ug diyotay, mag-anig diyotay, apan ang nagpugas ug daghan, mag-anig daghan. Busa kinahanglan mohatag ang tagsatagsa sumala sa iyang gusto, ug dili magbagutbot ni maghunahuna nga gipugos siya, kay ang Dios nahigugma sa naghatag nga malipayon."

2 Corinto 9:6-7

"Mangutana ako, matarong ba sa usa ka tawo ang pagtikas sa Dios? Dili, apan gitikasan ako ninyo. Sa unsang paagi? Sa mga **ikapulo** ug mga **halad**."

Malaquias 3:8

- Atong makita sa Malaquias 3:8 nga dili lang ang "ikapulo" (tithe) ang gipangayo sa atong Ginoo kondili lakip ang mga "halad" (offering). Ang ikapulo (10 %) sa atong kinitaan dili mao ang mga halad. Ang halad nagagikan sa imong nahibilin nga 90 %. Ang imong halad ginakuha human ka nakahatag sa imong ikapulo. ***Sa imong paghatag sa ikapulo, ang Dios ang nagbuot pila-10%, apan sa imong paghatag ug mga halad ikaw ang magbuot pila ang imong ihatag.*** Ang imong paghatag sa mga halad mao ang imong "pagpugas sa trabaho sa Ginoo". Kon motanom ka ug gamay moani ka ug gamay, apan kon mopugas ka ug daghan moani ka ug daghan (2 Corinto 9:6-7). Sa imong paghatag ug ikapulo wala ka nagtanom kondili nag-uli lang unsay iya sa Ginoo (Levitico 27:30), apan sa imong paghatag ug halad naghatag ka unsay imoha balik ngadto sa Dios. Mao kini ang "halad." Ang imong abot (harvest) nagdepende unsa ka daghan ang imong halad. Ang imong halad mao ang imong liso o binhi (seed).
- Ang ikapulo didto lang gyud nimo ihatag sa imong "Lokal nga Iglesia" (Malaquias 3:10) apan ang imong mga halad puwede nimo mahatag bisan asa nga trabaho sa Dios basta nagiyahan ka lang sa Espiritu Santo (Filipos 4:18). Pero puwede pod nimo mahatag ang mga halad ngadto sa imong Lokal nga Iglesia uban sa imong ikapulo. Dili kompleto ang

paghatag kon "ikapulo" lang kinahanglan maubanan gyud kini ug mga "halad."

## UNSAY MGA BATAYAN SA ATONG PAGHATAG?

### 1. Hatag uban sa kalipay.

"Busa kinahanglan mohatag ang tagsatagsa sumala sa iyang gusto, ug dili magbagutbot ni maghunahuna nga gipugos siya, kay ang Dios nahigugma sa naghatag nga malipayon."

2 Corinto 9:7

### 2. Hatag uban sa pagtuo

"Tungod sa pagtuo naghalad si Abel ngadto sa Dios ug mas maayong halad kay sa kang Cain. Tungod sa iyang pagtuo gikahimut-an siya sa Dios ingon nga tawong matarong, kay gidawat man sa Dios ang iyang mga halad."

Hebreo 11:4a

### 3. Hatag uban sa saktong motibo.

"Himoa kini sa tago ug ang imong Amahan nga nagtan-aw sa imong gibuhay sa tago, moganti kanimo."

Mateo 6:4



## **UNSAY MGA GANTI SA MANGGIHATAGON?**

Pagmangggihatagon ug magmauswagon ka. Tabangi ang uban ug sila motabang kanimo."

Panultihon 11:25

"Panghatag kamo sa uban, ug ang Dios mohatag usab kaninyo: madawat ninyo ang hustong takos, ug pakapinan pa gayod, ibubo sa inyong mga kamot kutob sa inyong mahakgom."

Lukas 6:38a

- Pag-uswag, panalangin, panalipod ug pabor sa Dios ang ganti as manggihatagon!

## **PAG-APLIKAR NG MGA PANGUTANA:**

- ❖ Makadawat ka ba nga ikaw piniyalan lang sa Ginoo? Nga ang Dios maoy imong agalon?
- ❖ Asa sa tulo ka klase nga paghatag ang wala pa nimo nabuhat? Ngano man?
- ❖ Unsay mga rason nganong ang uban dili makahatag sa ilang ikapulo ug mga halad?

## **ADLAW SA GINOO** **(Maturity Series: Lesson 10)**

### **KINAHANGLAN BA KITA MOHATAG UG ADLAW PARA SA GINOO?**

"May naghunahuna nga adunay adlaw nga mas balaan kay sa ubang adlaw, samtang ang uban naghunahuna nga parihas kabalaan ang tanang adlaw. Libre ang matag usa sa pagsunod hain nini ang hugot niyang gituohan. Ang naghunahuna nga mas balaan ang usa ka adlaw kay sa ubang adlaw nagpasidungog sa Ginoo..."

Roma 13:5-6a

Sa mga pasahe sa itaas atong makita nga libre ang tawo pagpili unsang adlaw ang iyang gituohan nga balaan basta ang importante nga iya kining gihatag pagpasidungog ngadto sa Ginoo. Sa tinuod lang ang tanang adlaw espesyal kay gibuhad kini sa Dios (Salmo 118 24). Pero mas maayo sad nga aduna kitay 'ilain nga adlaw' nga lahi sa ubang mga adlaw. Niini nga adlaw dili kita manarbaho kondili mosimba kita sa Dios uban sa atong pamilya ug sa ubang mga magtutuo. Adlaw kini para sa Ginoo. Kini nga adlaw mao ang adlaw'ng "Domingo" (Sunday).

### **NGANONG ADLAW MAN SA DOMINGO?**

#### **1. Adlaw kini sa pagkabanhaw ni Ginoong Jesus.**

"Sayo sa Domingo sa buntag, samtang ngitngit pa, si Maria Magdalena miadto sa lubnganan ug nakita niya nga ang bato naligid na gikan sa baba sa lubnganan."

Juan 20:1

- Namatay ug gilubong si Ginoong Jesus pero sa ikatulo ka adlaw, sa adlaw'ng Domingo, nabanhaw siya. Gitawag ni Apostol Juan ang "adlaw sa pagkabanhaw" ni Jesus nga "Adlaw sa Ginoo" (Gipadayag 1:10) ug kini nga adlaw-Domingo. Nagasimba kita nga hinugpong matag Domingo tungod kay mao kini ang adlaw sa iyang pagkabanhaw, ang adlaw diin iyang gibuntog ang kamatayon ug lubnganan!
- Ang adlaw'ng Domingo dili mao ang "Adlaw nga Igpapahulay." Sa Karaang Tugon ang Sabado Imao ang Adlaw nga Igpapahulay apan karon sa Bag-ong Tugon ang atong Igpapahulay (Sabbath) mao na si Kristo (Mateo 11:28-30; Colosas 2:16-17). **Ang atong kapahulayan karon dill adlaw kondili persona-si Jesus.** Siya ang Ginoo sa kapahulayan (Marcos 2:27-28). Dili kini pahulay sa lawas kondili sa atong kalag. Dili kada Sabado lang ang atong pahulay kondili kada adlaw dinha ni Kristo.

## 2. Una kining adlaw sa semana.

- Ang unang adlaw sa semana dili Lunes kondili Domingo. Mamatud-an kini sa Biblia diin ang Sabado (Adlaw nga Igpapahulay) mao ang ika-pito nga adlaw ug ang Domingo mao ang unang adlaw sa semana (Mateo 28:1; Juan 20:1). Mamatud-an usab kini sa atong kalendaryo diin gibasi sa panahon ni Jesus. Kinahanglan kini maklaro aron atong

matuman ang prinsipyo sa "**pagpangita pag-una sa Gingharian sa Dios**" (Mateo 6:33).

- Kung Domingo ang unang adlaw sa semana dapat lang nga mahatag nato kini ngadto sa Dios. Ang adlaw sa Domingo dili panahon pagpangita ug kuwarta o pagsuroysuroy kondili panahon kini para sa Ginoo ug sa iyang pamilya. *Kung nahatag nato ang unang adlaw sa semana" nakasiguro kita nga ang ubang adlaw niana nga semana mapanalanginan'.* Ang ubang butang idugang kanato kung siya ang atong unahon.

## 3. Usa kini sa mga adlaw diin ang unang iglesia nagatapok.

- Adunay mga bersikulo sa Biblia nga ang unang iglesia nagatigom matag Domingo aron pag ambit sa "panihapon sa Ginoo" ug pagpaminaw sa wali" (Buhat 20:7). Ang iglesia sa Corinto nagatapok matag Domingo ug usa sa ilang ginabuhat mao ang paghatag ug salapi ngadto sa trabaho sa Ginoo (1 Corinto 16.2). Wala kini nagpasabot nga sa matag Domingo lang nagakatigom ang unang Iglesia. Ang Biblia nagsulti nga nagatigom sila matag-adlaw (Buhat 2:46).

## UNSAY MAHITABO MATAG TIGOM KADA DOMINGO?

Adunay upat ka maayong butang nga ginabuhat sa mga magtutuo kada Domingo. Dili kinahanglan nga magsunod pagkahan-ay kining upat pero importante nga anaa kini sa mga panagtigom nga hinugpong. Kini nga mga espirituhanong gimbuhaton makita sa Biblia.

### **1. Hinugpong nga pagsimba pinaagi sa mga awit.**

"Awiti nga malipayon ang GINOO, kamong tanang katawhan! Simbaha nga malipayon ang GINOO, ug panuol kamo kaniya uban sa malipayong mga awit!"

Salmo 100:1-2

### **2. Hinugpong nga pagsimba pinaagi sa paghatag sa salapi.**

"Dad-a ang tibuok nga ikapulo ngadto sa Templo..." (Malaquias 3:10)

### **3. Hinugpong nga pagpaminaw sa mensahe sa Dios.**

....nagbigom kami.....Ug ang mga tawo giwalihan ni Pablo..." (Buhat 20:7)

### **4. Pagministeryo sa mga nagkinahanglan.**

"Kon adunay nagmasakiton kaninyo, ipatawag ang mga pangulo sa iglesia aron mag-ampo alang kaniya....Ang maong pag-ampo nga inubanan sa pagtuo makaayo sa masakiton; ang Ginoo mopahiuli kaniya sa maayong panglawas ug mopasaylo sa iyang mga sala."

Santiago 5:14-15

### **ASA KITA MOSIMBA MATAG DOMINGO?**

1. Asa kita mabusog ug matagbaw sa espirituhanong pagkaon (Mateo 4:4).
2. Asa kita makabati sa presensiya sa Dios (Salmo 63:2).
3. Asa kita mabag-o, motubo ug magamit (Salmo 92:12-14).

### **PAG-APLIKAR NGA MGA PANGUTANA:**

- ❖ Nabatasan naba nato nga matag Domingo mosimba gayod kita?
- ❖ Nakasinati ba kitag katagbawan ug kabag-ohan sa simbahan nga kita nagasimba matag semana?
- ❖ Unsay rason nga ang uban walay panahon sa pagsimba?

## ANG BALANG ESPIRITU (1)

(Maturity Series: Lesson 11)

"Mangayo ako sa Amahan, ug hatagan kamo niyag laing Manlalaban, ang **Espiritu sa kamatuoran**, aron makig-uban kaninyo hangtod sa kahangtoran. Ang kalibotan dili makadawat kaniya, kay dili man kini makakita ni makaila kaniya. Apan nakaila kamo kaniya, kay nag-uban siya ug nagpuyo diha kaninyo.

Juan 14:16-17

Nag-ingon ang atong Ginoo nga ang mga 'dili pa magtutuo' dili makaila sa Espiritu Santo apan kita makaila kaniya kay siya nagpuyo ug nag-uban naman kanato. Kinahanglan atong mailhan ang Balaang Espiritu. Maghisgot kita karon ug tulo ka butang mahitungod kaniya.

### 1. ANG BALANG ESPIRITU-DIOS (GOD)

- Ang Biblia nagpadayag nga ang atong Dios nalangkob sa tulo ka persona, *"Amahan, Anak, ug Espiritu Santo"*. Usa ka Dios pero tulo ka persona. Sama sa nakasal nga magtiayon, duha pero usa ra (Genesis 2:24). Dili Dios ang Dios kung usa ra o duha ra ka persona. **Tulo ka persona ang naglangkob sa usa ra ka Dios.** Daghan kaayong mga bersikulo sa Biblia nga kini silang tulo ka persona parte gyud sa usa ka Dios ug dili puwede mabulag. Aniay pipila ka mga bersikulo nga nagmatuod niini (Mateo 28:19; 1 Corinto 12:4-6; 2 Corinto 13:14).

- Ang Amahan Dios (Efeso 4:6), ang Anak Dios (Hebreo 1:6-8), ug ang Balaang Espiritu Dios (Buhat 5:3-4). Pero usa ra ka Dios. Lisod kini sabton pero mao kini ang gipadayag sa Biblia busa mao kini ang atong tuohan. Dili nato masulod ang kinatibuk-an sa Dios sa atong hunahuna, kay kon kini atong mahimo dili na siya Dios. Ang iyang gipadayag pinaagi sa Biblia atua apan ang wala dili na nato utingkayon (Deuteronomio 29:29).

### Ang Balaang Espiritu Dios tungod kay...

- Naa siya bisan asa (Omnipresent)-Salmo 139:7
- Kahibalo siya sa tanan (Omniscient)- 1 Corinto 2:10-11
- Gamhanan siya sa tanan (Omnipotent) - Salmo 104:30
- Wala siyay sinugdanan ug kataposan (Eternal)-Hebreo 9:14

- Ang Balaang Espiritu dili ubos sa Amahan ug sa Anak kondili "katupong" (Mateo 28:19). ***Tungod kay Dios ang Espiritu Santo puwede siya himayaon, simbahon, ug daygon sama sa atong ginabuhay ngadto sa Amahan ug sa Anak.*** Dili masina ang Amahan ug ang Anak kung ato kining buhaton kay wala kana kanila, hinuon malipay sila kay atong giila ang Espiritu Santo sa iyang pagkasiya, usa ka Dios.

### 2. ANG BALANG ESPIRITU-PERSONA (PERSON)

Sa nasulti na sa unahan, ang atong Dios usa ra pero nalangkob sa tulo ka persona. Ang Amahan mao ang Anak, ug dili usab siya mao ang Espiritu Santo. Ang Anak usab dili mao ang Amahan, ug dili usab siya mao ang Espiritu Santo. Ang Espiritu Santo dili mao ang Amahan, ug dili usab siya mao ang Anak. **Tulo ka persona ang Dios: Amahan, Anak, ug Balaang Espiritu.** Dili tulo ka Dios kondili tulo ka persona sa usa ka Dios. Walay problema sa kadaghanan kung moingon kita nga ang Amahan ug ang Anak nga si Jesus mga persona. Pero kung moingon na gani kita nga ang Balaang Espiritu persona ang uban dili na makadawat. Ang ilang pagtan-aw sa Espiritu Santo gahom lang sa Dios. Kini nga pagsabot sayop ug dili mabasi sa Biblia

■ Tinuod, ang Espiritu Santo adunay gahom pero una sa tanan usa siya ka "persona". Wala siyay pisikal nga lawas tungod kay siya espiritu pero aduna siyay personalidad. **Ang Balaang Espiritu...**

i. Adunay hunahuna (mind)-Roma 8:27

ii. Adunay kabubut-on (will)-1 Corinto 12:11 in.

iii. Adunay pagbati (emotion)-Efeso 4:30

iv. Makasulti (speaks)- Gipadayag 2:7

■ Ang Balaang Espiritu persona ug aduna siyay sensitibo kaayo nga kinaiya. Nagpasabot kini nga aduna siyay pagbati nga puwede ma-apiktohan sa atong mga kinaiya ug binuhatan. Tungod niini ang Biblia nagpahimangno nga:

i. Dill kita mamakak sa Balaang Espiritu (Buhat 5:3-4)

ii. Dill kita mosupak sa Balaang Espiritu (Isaias 63:10; Buhat 7:51)

iii. Dili nato pasub-on ang Balaang Espiritu (Efeso 4:30)

iv. Dili nato santaon ang Balaang Espiritu (1 Tesalonica 5:19)

v. Dili nato insultohon ang Balaang Espiritu (Hebreo 10:29)

vi. Dili kita magbugalbugal sa Balaang Espiritu (Mateo 12:31-32)

■ Ang Balaang Espiritu usa ka persona. Aduna siyay panghunahuna ug pagbati. Tungod niini kinahanglan nga ato siyang tagdon ug istoryahon. Gitawag kita sa pakig-dait ngadto kaniya (2 Corinto 13:13, 14; Filipos 2.1). Ato siyang himoon nga amigo ug suod nga higala. Dili nato siya makita pero atong mabati ang iyang presensiya ug atong madungog ang iyang tingog. Magtuon kita paglakaw uban kaniya (Galacia 5:25).

### **3. ANG BALANG ESPIRITU MAO ANG DIOS NGA ANAA KARON (GOD OF THE NOW)**

■ Ang Dios Amahan ug ang Dios Anak atua sa langit (Marcos 16:19) apan ang Balaang Espiritu ania nag-uban kanato (Juan 14:16). Siya ang Dios nga ania karon ug nagpuyo sulod kanato (1 Corinto 3:16). Tungod niini makabaton gayod kita ug tinuod nga kabag-ohan ug kagawasan (2 Corinto 3:17). Pinaagi sa Espiritu ang kinaiya ug hulagway sa Dios mahibalik kanato.

"...ug ang maong himaya nga naggikan sa Ginoo nga mao ang Espiritu, mag-usab kanato ngadto sa iya gayong dagway sa labi pang dako nga himaya."

2 Corinto 3:18b

"Apan ang Espiritu naghatag sa gugma, kalipay, kalinaw, pailob, kaluoy, kaayo, pagkamaminatud-on, pagkamapaubsanon ug pagkamapinugnganon sa kaugalingon."

Galacia 5:22-23

#### **PAG-APLIKAR NGA MGA PANGUTANA:**

- ❖ Unsay bag-o nga atong natun-an mahitungod sa atong leksiyon karon? Ngano man?
- ❖ Unsay atong mga lakang nga buhaton aron atong masuod ang Espiritu Santo?
- ❖ Mailhan ug masinati ba nato ang Amahan ug ang Anak kung wala ang Espiritu Santo?

## **ANG BALANG ESPIRITU (2)**

**(Maturity Series: Lesson 12)**

Niadtong maging semana atong nahisgutan ang Balaang Espiritu. Atong nasabtan nga ang Espiritu Santo, Dios, busa angay nato siyang simbahan ug daygon. Siya usab persona ug adunay pagbati busa makigdait ug makighigala kita kaniya. Ang Espiritu mao usab ang Dios nga ania nagauban kanato. Atong mabati ang presensiya sa Amahan ug sa Anak pinaagi kaniya. Siya ang Espiritu sa Amahan ug sa Anak (Mateo 10:20; Roma 8:9) Karon, magpadayon kita pagtuon mahitungod sa Balaang Espiritu aron ato pa gyud siyang mailhan.

#### **ANG MINISTERYO SA BALANG ESPIRITU NGANHI SA ATONG KINABUHI:**

##### **1. Ang Espiritu Santo motestigo sulod kanato nga kita mga anak na sa Dios.**

- Kung atong gidawat si Kristo nga atong Manluluwas ug Ginoo ang Espiritu Santo misulod na sa atong kasingkasing ug nagmatuod nga kita mga anak na gyud sa Dios.

"Makighiusa ang maong Espiritu sa atong espiritu ug magmatuod nga mga anak na kita sa Dios".

Roma 8:16

## **2. Ang Espiritu Santo motabang kanato sa atong mga pag-ampo.**

- Kinahanglan mangayo kita ug panabang sa Balaang Espiritu unsay atong I-ampo ug unsaon kini nato pag-ampo. Ang Espiritu maoy atong tigpangaliyupo dinhi sa yuta.

"Sa samang pagkaagi, sa atong pagkahuyang tabangan kita sa Espiritu, kay wala kita masayod unsaon nato pag-ampo; ang Espiritu mismo mangaliyupo sa Dios alang kanato..."

Roma 8:26

## **3. Ang Espiritu Santo motabang kanato sa atong pakighilambigit sa Biblia.**

### **Motabang ang Balaang Espiritu...**

#### **i. Sa atong pagsabot ug paghinumdom sa pulong sa Dios.**

Sa atong kaugalingong panghunahuna maglisod kita ug sabot sa pulong ni Kristo apan pinaagi sa tabang sa Espiritu makasabot kita niini. Siya ang atong magtutudlo sa Biblia.

"Ang Manlalaban, ang Espiritu Santo nga ipadala sa Amahan sa akong ngalan, magtudlo ug magpahinumdom kaninyo sa tanan nga akong gisulti kaninyo."

Juan 14:26

#### **ii. Sa atong pagkinabuhi sa pulong sa Dios.**

Ang Espiritu maoy motukmod ug mohatag kanato ug gahom aron matuman nato ang Pulong.

"Ibutang ko sa sulod ninyo ang akong Espiritu ug himoon ko kamong masinugtanon sa akong mga gimbut-an ug mga lagda."

Ezequiel 36:27

## **3. Ang Espiritu Santo motabang kanato nga magpuyo nga balaan.**

- Ang Balaang Espiritu mohimo kanato nga balaan ug motabang nga magpabilin kita nga balaan. Pinaagi kaniya atong mabuntog ang tawhanong kinaiya ug mga tintasyon.

"Kon magkinabuhi kamo minandoan sa tawhanong kinaiya, mamatay gayod kamo; apan kon pinaagi sa Espiritu patyon ninyo ang tawhanong binuhatan, mabuhayod kamo."

Roma 8:13

"Kini ang akong isuli kaninyo: paharia ang Espiritu sa inyong kinabuhi, ug ayaw patumani ang mga pangandoy sa tawhanong kinaiya."

Galacia 5:16

## **5. Ang Espiritu Santo motudlo ug moglya kanato sa tanang butang.**

- Adunay panahon nga nanginahanglan kita ug paggiya tungod kay anaa kita sa kalibog asay iya sa Ginoo (God idea) ug asay gikan lang kanato (good idea). Ang Balaang Espiritu dili lang motudlo kanato mahitungod sa mga espirituhanong butang, siya usab makagiya kanato sa bisan unsang butang. Sa pamilya, negosyo, eskuwela, trabaho, pag-asawa ug uban pa. Siya ang atong giya sa tanang butang. Magatudio siya kanato unsay kabubut-on sa Dios. Ang Juan 14:26 nag-ingon: "Ang

*manlalaban, ang Espiritu Santo nga ipadala sa Amahan sa akong ngalan magtudlo kaninyo sa tanang butang..."*

"Apan inig-abot sa Espiritu sa kamatuoran, tultolan kamo niya sa tibuok kamatuoran."

Juan 16:13a

#### **6. Ang Espiritu Santo mopadayag kanato sa mga tinagong butang sa Dios.**

- Ang Balaang Espiritu magpadayag kanato sa mga tinagong butang sa Dios. Kung suod ug higala nato ang Espiritu sa Dios mapuno kita sa langitnong kaalam ug kahibalo. Walay katuyoan sa Dios nga malilong kanato. Ang Espiritu mobutyag sa mga sekreto sa Dios nganhi kanato kung mohatag kita ug panahon sa pagpaminaw kaniya.

"Apan gipadayag kanato sa Dios ang iyang tinago pinaagi sa iyang Espiritu. Ang Espiritu nagsusi sa tanang mga butang, bisan pa niadtong labing natago nga mga katuyoan sa Dios."

1 Corinto 2:10

#### **7. Ang Espiritu Santo mopadayag kanato sa mga butang umaabot.**

- Di lang mopadayag ang Espiritu sa mga tinagong butang sa Dios kondili mopadayag usab siya sa mga butang umaabot. Dili siguro hingpit gyud nga detalye pero mohatag gyud siya ug panan-awon ug mga pagpadayag unsay gusto buhaton sa Dios nganhi sa atong kinabuhi, pamilya, trabaho, ministeryo ug bisan gani sa atong lugar. Ang panan-awon maoy lingguwahe sa Balaang Espiritu (vision is the language of the Holy Spirit). Sa

Juan 16:13 nag-ingon: "Apan inig-abot sa Espiritu sa kamatuoran...sultihan kamo niya sa iyang nadungog ingon man sa mga butang umaabot".

#### **PAG-APLIKAR NGA MGA PANGUTANA:**

- ❖ Posible ba nga atong mahigala ang Espiritu nga dili man siya nato makita?
- ❖ Makapuyo ba kita sa Kristohanon nga kinabuhi kung wala ang Espiritu Santo?
- ❖ Unsay atong buhaton aron atong masuod ang Balaang Espiritu?